



15. februar 2010

UPA 2010/59

Inatsisartut Suleriaasianni § 35 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Namminersorlutik inuutissarsiorniarlutik aallarteqqaat pillugit Akileraartarneq pillugu Isumalioqatigiissitap misissuisariaqarnera pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaak Akitsinnguaq Olsen, Siumut)

**Tungavilersuut:**

Naalakkersuisut suleqatigiinnissamut isumaqatigiissutaanni naalakkersuisooqatigiit akileraarneq pillugu isumalioqatigiinnissaminnut imminnut pitutorput. Isumaqatigiissut naapertorlugu akileraarnermut isumalioqatigiissitami ingerlassat aalajangersimasut assigiinngitsut iluini akileraasariaatsit misissuiffiqineqassapput, kiisalu inunnik isumagininnikkut ineqarnikkullu tapiissutaasartut misissuiffiqineqassapput qulaajaneqassallutik.

Matumuunali apeqquteqaat aallaavigalugu oqallinnissamut siunnersuuteqarnermi namminersorlutik ingerlatsisut aallarteqqaat, kiisalu suliffeqarfiit mikinerusut nutaaliortutik nerisassat tungaasigut tunisassiorliortutik ingerlatsisut akileraartarnikkut qanoq atugaqarneri qitiutikkusuppakka.

Isumaga naapertorlugu nunatsinni namminersorlutik ingerlatsiniortutik aallartittut periarfissaat, pitsaaliornissaminnullu periarfissaat pitsanngorsartuortariaqarput. Inuutissarsiornikkut ineriortortitsineq avaqqullugu inuiaqatigiinni atugarissaarnerup ineriortortinnissaa tamatta kissaatigisarput akissaqartinneqarsinnaanngilaq.

Namminersorlutik inuutissarsiornikkut ingerlatserusuttut pimoorussivigineqartariaqarput – maannamummi takusareeqarput pisortat inuutissarsiornermik ingerlatsinerlutik piukkunnarnerpaanngitsut. Inuutissarsiornikkut ineriortortitsinerlu atukkat tamakkiisumik pitsanngorsarnerisigut namminersortut aamma nunatsinni inuiaqatigiit aningaasaqarnerannut annertunerusumik akuulersinnaapput, tamannalumi pissusissamisoorluinnassaaq.

Taamaammatt akileraarneq pillugu isumalioqatigiissitaliap sulinerani namminersorluni inuutissarsiornermik ingerlatsinerlu akileraartariaatsip pitsanngorsarneratigut aallarniiniarneq periarfissineqarsinnaanersoq ilanngullugu misissukkanut ilaatittariaqarpoq. Ilaatigut eqqarsaatigineqarsinnaavoq suliffeqarfiit namminersortut nutaat aallartisarnerminni ukiuni pingasuni akileraartaratik ingerlasinnaanissaannut periarfissiineq.

Taamaaliortnerup ilaatigut suliffeqarfinnik nerisassanik nioqqutissiornerlu aallartiserusuttoqalernissaa neriuutiginarpoq, kingunerissammagumi arlaleriaqaluni naalakkersuinikkut kisaatigineqartarsimasoq, tassaasoq nerisassanik nioqqutissanik immitsinnut pilersorsinnaanerput. Nunaqarfimmiunut tunitsivinnik nammineerlutik suliffeqarfittut

annertunerusumik ingerlatsilernissaannut kajumissaarutigineqarsinnaanera  
takorloorneqarsinnaavoq, taamaaliornermi ullumikkut ingerlatsinermut sanilliullugu  
qularnanngitsumik eqaannerujussuarmik ingerlatsisoqarsinaalissammat. Aammattaaq  
ilinniagaqarsimasunut naammasserlaanut namminersorlutik suliffeqarfiliorusuttunut  
qularnanngitsumik kajumissaataasinnaassalluni.

Assersuutitut saqqummiussat immini naammangillat, soorunalumi taakkuinnaanatik.  
Isumalioqatigiissitaliap eqqarsaatersornerani ajornartorsitaasup anigorniarnernut periarfissat  
siunnersuutillu allat ilaatittariaqarput. Isumalioqatigiissitaliap aaqqiissutaasinnaasunik  
siunnersuusiornermini ilanngullu aaqqiissuussinerit atonerlunneqannginnissaat  
misileraaffiinnannginnissaallu qulakkeerniarlugu eqqarsaasorsorluartariaqarpoq.

Inatsisartuni partiit matumani apeqquteqaat aallaavigalugu oqallinnermi isummanik  
arlaqarnerusunik saqqummiusserusunnissaat qularinngilara.

Isummat saqqummiunneqartut sukumiisumik piviusorsiorlumillu oqaluuserinerini akileraarnermut  
isumalioqatigiissitaliap sulineranut aallaavissat iluaqutigisinnaasaallu pillugit Inatsisartut  
oqaaseqaatissamik isumaqatigiissuteqarsinnaanerat neriuutiginarpoq.